

元
詩
紀
事

元詩紀事卷六

侯官 陳衍 緝

王振鵬字朋梅永嘉人侍仁宗於東宮延祐中官秘書

監典簿

道園學古錄嘗爲大明宮圖以獻世稱爲絕

自題蜻蜓畫卷

露涼芳草曉風吹紗翼輕明水影欹莫便臨平山下去眼
晴雙眩碧琉璃

七修類稿王振鵬元世祖時人善詩畫仁宗賜號
孤雲處士予幼時見有蜻蜓詩畫卷於里中旌德
觀誠妙筆也詩有黍離之哀想宋季之遺黎其卷
多名人題識今亡矣今以記憶者錄之於左其自
題蜻蜓詩云云末二句意其寫圖之時必伯顏駐
師皋亭之日不忍故國垂亡而虜騎之覬覦得詩

人之比也

劉鶚字楚奇永豐人皇慶間薦充揚州儒學錄官至江西行省參政顓寇亂被執不屈死有惟實集

絕筆

生爲元朝臣死作元朝鬼忠節旣無慚清風自千古

乾坤正氣集
江西通志公被執至顓賊幽之慈雲寺仲子述亦在焉公作詩付述不食六日而卒

陳櫟字壽翁自號定宇休甯人延祐間與鄉貢不就禮部試歸元統間卒

汪炎昶撰行狀鄉先達方公回曹公涇皆號文場老手先生相與切磋甚爲二公所敬服

和方虛谷上南行十二首

濟世萬古航乃今橫野渡由此訪故人勝著沙隄步我傳
紀行作冠珮與薇露何當叅詩禪一漣石頭路

右古航渡

又過分流岑行行足聊休流品分良難感此胡分流大雅
久不作梁棟儕薪煙凋鳩笑鵬鵬一是逍遙遊

右分流嶺

南山得宣平名字可千載世無死仙人花瓢今定在家山
有此逢何必跨瀛海下視白雲衣蒼狗須臾改

右過南山

疇昔飲雙橋獨木寬法程如今過雙橋無復糟床聲橋外
吏人稀飲徒常二更追詠承平事畧此記西京

右過雙橋

舊官權酒或城十里始飲村
醪數橋酒稍佳今復無有

扁舟泛古航昔常聞此奇盤屈公詩中眼明再見之二孤
恐飛來或乃巨靈移甚勿訛爲姑又須訂茲茲

右岑山渡

杏花富趙村佳名昉唐代酣酣紅雨春芳葩誰不愛轉眼
鐵爐步發問莫能對杏村無杏花趙村亦安在

右過杏村

坡覓牛矢路公渡牛矢嶺遂令污穢地居然化清境今代
曹子方陳三延癩頸何時躡吾履迢迢山路永

右過牛矢嶺

我未讀公詩久矣知葉有地非產此人知此地否當與

君子鄉俱傳千載後風鑒幽春陽高節且堅守

右過葉有嶺

和方虛谷二首

後漢袁與楊世公五或四袁衣苟有愧不如安楚製我不
識斯人聊復視其世不有此翁賢安得賢主器

又

天壤一虛叟見之夢寐中豈必真及門私淑恩何窮易說
曉欄白詩編夜檠紅終然欠叅請小草依松風

寄曹宏齋

我不識宏齋識之文字間古風久蕭瑟一筆獨追還恨如
東魯人未得登東山振衣不自勇路亦非阻艱

寄王教授

書堂名博士得見未恨晚發揮紫陽論登峰造其巘仕得
四十強程方九萬遠北山勿移文秋桂芳風遣

定宇先生文集方公上南行詩予嘗和寄宏齋宏
齋達之方公公選五首附刊於集

吳彬字仲文

句

雨添新水半篙綠風滅殘花幾片紅
淡勻姑射仙人貌
清奪林逋處士魂

勤有堂隨錄程斗山雪詩云良謀雖已禽元濟勝
賞無如得李狸誠齋雖賞借李狸言牛尾狸然恐
不可止作如此用之又古詩云欲騎揚州鶴不食
武昌魚揚州猶可上武昌不可居對巧意未粹吾
甥仲文詩云云工而妥梅花詩云云奪字未妥當
改作返

馬祖常字伯庸世爲永古特部居靖州之天山高祖爲
鳳翔兵馬判官子孫因號馬氏延祐初鄉貢會試
皆第一廷試第二官至御史中丞諡文貞有石田

集

和王左司竹枝詞二首

日邊寶書開紫泥內臣珠帽輦步齊君王視朝天未旦銅
龍漏轉雞人啼

金爐寶熏留篆雲花間百舌鳴早春五坊戲馬賽爭道傳
聲催賜十流銀

西湖竹枝集中丞詩名敵虞王西夏氏之詩振始
於石田集也竹枝蓋和繼學之作其音格矯健頗
山谷老人云

龍虎臺應制

龍虎臺高秋意多翠華來日似鸞坡天將山海爲城塹人
倚雲霞作綺羅周穆故慚黃竹賦漢高堂奏大風歌兩京
巡省非行幸要使蒼生樂至和

元史文宗嘗駐蹕龍虎臺祖常應制賦詩尤被歎賞謂中原碩儒惟祖常云

楊載字仲宏建之浦城人延祐初登進士第官至甯國
路總管府推官有仲宏集

黃文獻集年幾四十不仕賈戶部國英數言其材能於朝遂以布衣召入擢翰林國史院編修官其文如長風怒帆一瞬千里至於崎岸之縈折絃歎枕側亦未始有所留礙
楊載詩法家數予於詩之一事用工凡二十餘年乃能會諸法而得其一二
睽車志楊仲宏以下詩文多殺機鬼氣

宗陽宮望月分韻得聲字

老君堂上涼如水坐看氷輪轉二更大地山河微有影九
天風露寂無聲蛟龍並起承金榜鸞鳳雙飛載玉笙不信
弱流三萬里此身今夕到蓬瀛

西湖游覽志宗陽宮本宋德壽宮後圃也內有老君臺得月樓杜道堅號南谷當塗人風度清雅嘗以中秋集儒彥登老君臺玩月分韻賦詩楊仲宏爲首唱

紀夢

海上垂綸有幾年平居何事夢朝天蒼龍觀闕東風裏黃
道星辰北斗邊治世祇今逢五百前程如此隔三年楊雄
解奏甘泉賦應有聲名達帝前

歸田詩話蒼龍觀闕東風裏黃道星辰北斗邊日照九衢平似水胡兒吹笛內門前此宋龐右甫過

汴京詩也甚感慨有味仲宏作紀夢詩乃全用其一聯何也

寄劉師魯

想君游宦處正值洞庭湖落日波濤壯晴天島嶼孤舟航
通漢沔風物覽衡巫天下文章弊非公孰起予

詩法正論此以興爲承賦爲轉者也

古牆行

建炎白馬渡江時循王以身佩安危疏恩治第壯輿衛縮
板載榦絲偏裨下鋪江城但沙鹵往夷赤山取焦土帳前
親兵力如虎一日連雲興百堵引錐刺之鐵石堅長城在
此勢屹然上功幕府分金錢謹聲如雷動地傳爾來瞬息
踰百年高崖爲谷驚摧遷華堂寂寞散文礎喬木慘淡淒

寒煙我入荒園訪遺古所見惟存丈尋許廢壞終嗟麋鹿
游飄零不記商羊舞王孫欲言淚如雨爲言王孫母自苦
子孫再世墮門戶英公尙及觀房杜如君百不一二數人
生富貴當自取況有長才文甚武公侯之後必復初好把
家聲繼其祖

歸田詩話長篇如古牆行梅梁歌皆爲時所推許
夫人翟氏予祖姑也嘗以仲宏親筆草稿數紙授
予字畫端謹而前後點竄幾盡蓋不苟作如是

句

風雨五更雞亂叫江湖千里雁相呼挾書萬里求明主
仗劍三年別故鄉窗間夜雨消銀燭城上春雲壓綵旗
空桑說法黃龍聽貝葉繙經白馬馱

歸田詩話楊仲宏以宗陽宮玩月詩得名然他作如云云沈雄典實先叔祖每稱之

范梈字亨父一字德機清江人薦爲佐衛教授官至湖

南嶺北廉訪司經歷人稱文白先生所著有燕然

東方等稿

揭文安公文粹與浦城楊載仲宏蜀郡虞集伯生齊名而余亦與之游伯生嘗評曰楊仲宏詩如百戰健兒范德機如唐臨晉帖以余爲三曰新婦而自比漢廷老吏也聞者皆大笑余獨謂范德機詩以爲唐臨晉帖終未逼真今故改評之曰范德機詩如秋空行雲晴雷卷雨縱橫變化出入無朕又如空山道者辟穀學仙瘦骨峻嶒神氣自若又如豪鷲掠馬獨鶴叫羣四顧無人一碧萬里差可彷彿耳

詩家一指洗鍊范德機如鑛出金云云清奇范德機娟娟羣松云云

詩學禁嚮清江范德機以詩名天下編集唐人之詩具爲格式

四溟詩話范德機曰絕句則先得後兩句律詩則

先得中四句當以神氣爲主全篇渾成無鉅釘之迹唐人間有此法

詩法正論我朝有巨古所無之混一故有巨古所無之氣運一時文人如劉靜修姚牧庵盧疎齋元復初趙子昂諸先達固已名世矣大德中清江德機先生獨能以清拔之才卓異之識始專師李杜以上溯三百篇其在京師也與伯生虞公子昂趙公仲宏楊公曼碩揭公諸先生倡明雅道以追古人由是而詩學丕變范先生之功爲多曼碩嘗語人曰近年詩流善評者無如劉會孟能賦者僅見范德機熊雪嶠曰范詩如絕色婦人洗淨脂粉與人關妍故無有及之者周靖之謂余曰范公踐履不愧古人故其詞翰亦不愧於古人要皆自其胸次流出不可彊學而能也且范先生嘗曰吾平生作詩稿成讀之不似古人即削去改作

蒼山感秋

蒼山秋意長池館靜而閑雨止修竹間流螢夜深至皇義世云遠雅頌日凋弊舉手遏頽波誰識作者志烏啼魯東

門泗水不染袂後去三十年直可肩聖知機關繫風化詞
語特細事月落閉虛簾坐夢太古帝揚眉頰玉色盡發養
生秘勿謂學仙難此道可立致

詩法正論如德機范先生感秋詩云云觀於此詩
意義深遠矣

草木子昔危太朴與德機同晚步德機得雨止二
句喜甚既而曰語太幽殆類鬼作

閩州歌

閩州土俗戶不分生子數歲學繡文圍綳坐肆雜男女誰
問小年曾識君古來夜行須秉燭今者衢路走紛紛那更
誅求使者急鞭笞一似雞羊羣古來閩閣佩鉞管今者女
工徵六軍雖復太平少征戰設有備豫將何云去年居作
匠五千耗費府藏猶煙雲官胥培克常十八况以鳩斂奪

耕耘祇今棄置半不用民勞竟是誰歡忻歲歲條章省煩
費幸且不省無方殷唐虞在上儉且勤後王猶復錦繡焚
豈有夔龍讓姚宋不言忍使憂心熏觀風自是使者職作
歌雖遠天應聞

元史改擢福建閩海道知事文繡局取良家子爲
繡工無別尤甚梓作歌詩一篇述其弊廉訪使取
以上聞皆罷遣之其弊遂革

掘塚歌

昨日舊塚掘今朝新塚成塚前兩翁仲送舊還迎新舊魂
未出新魂入舊魂還對新魂泣舊魂丁寧語新魂好地不
用多子孫子孫綿綿如不絕曾孫不掘元孫掘我今掘矣
良可悲不知君掘又何時

七修類稿掘塚歌清江范德機作也范以閩州歌并此皆爲風俗所興而閩州者因得上聞故著名史冊且爲一代詩人不知掘塚歌則繆理太甚歌云云據歌則人決不用子孫亦不用墳墓矣予意換中二句數字如曰好地還用好子孫子孫綿綿多頑劣曾孫不掘元孫掘斯義方妙

奉寄翰林鄧侍講

曩承持節江之東騎驢再上蓬萊宮蓬萊仙人歌白鶴聲落五湖煙雨中世間爵祿不易致何獨去就如飄風朝廷禮樂須制作六經隱義資發蒙論思廟堂集耆碩啟沃甯讓前諸公閉門讀書古都市四輩冠蓋方隆隆我生生長在窮谷那有文字爭人雄謬蒙引譽百僚上負祿府署慚無功一別十年今又五昔者少壯今成翁誰知復客七閩下隔二千里來詩筒羸軀頓醒癯癯惡賴以慰此心忡忡

粵王城南浪白白粵王城西花自紅

詩法正論此以興爲合者也

揭傒斯字曼碩龍興富州人延祐初薦授翰林國史院

編修官官至翰林侍講學士諡文安有秋宜集

黃文獻集程鉅夫盧摯前後持湖北使者節程公奇其才妻以從妹盧公尤愛其文表薦之李韓公孟以政府兼史館觀公所撰功臣傳撫卷歎曰此方謂之史筆他人真膽吏牘耳文宗聚勳戚大臣子孫於奎章閣教之擢公授經郎閣在興聖殿西公早作必徒步先至諸貴游受業者謀合錢爲賃馬公微聞之輒自置一馬尋復鬻之上有所咨訪恒以字呼之而不名

木天禁語編修楊仲宏曰五言短古衆賢皆不知來處乃只是選詩結尾四句所以含蓄無限意自然悠長此論惟趙松雪翁承旨深得之次則豫章三曰新婦曉得清江知之却不多用

揭曼碩詩宗正法眼藏學詩以唐人爲宗而其法寓諸律心神節制字數經緯小能使大大能使小

遠能使近近能使遠我法如有謂不必然者卿用卿法

詩家一指典雅揭曼碩玉壺買春云云

月山詩話揭曼碩一絕句云步出城南門悵望江南路前日風雪中故人從此去此本古詩曼碩嘗書以寄太虛後人因誤刻入秋宜集中南字古詩作東曼碩改之取其切合願承門耳曼碩集中此詩題作曉出願承門有懷太虛此題亦後人所爲

女兒浦歌二首

女兒浦前湖水流女兒浦前過湖舟湖中日日多風浪湖邊人人還白頭

大孤山前女兒灣大孤山下浪如山山前日日風和雨山下舟船自往還

西湖竹枝集文章居虞之次如歐之有蘇曾云其竹枝詞爲女兒浦歌其風調不在虞下也

高郵城

高郵城何長城上種麥城下種桑昔日鐵不如今爲耕
種場但願千萬年盡四海外爲封疆桑陰陰麥茫茫終古
不用城與隍

秋宜集過何得之先生故居詩膝下中郎小女曾
聽唱我高郵自注先生嘗喜余高郵城詩相見即
呼高郵城來每相對酒酣則朗誦數過

秋雁

寒向江南暖飢向江南飽莫道江南惡須道江南好

山語新話揭曼碩學士有題秋雁云云按此詩大
有寄託

送涂雲章訪舊武昌却入京師

垂雲厲驚風萬里摩高圓蟠泥鼓巨浪豈顧九重淵毛生
入楚庭脫穎俄頃間粲粲涂公子長嘯起邱樊朝辭豫章

臺暮過匡廬山大帆割鸚鵡極目空波瀾黃鵠錦袍仙吹
笙紫霞端相顧一笑粲青春滿南天黃金築高臺更覺郭
隗賢聯翩樂劇輩相逐入幽燕平明九門開劍佩踰五千
豈無一字薦傾倒平生言東風杏花開待我薊門前

詩法正論此以比興爲起者也

黃潛字晉卿義烏人登延祐二年進士第官至侍講學
士諡文獻有日損齋集

元史文辭譬之澄湖不波一碧萬頃同郡柳貫與
潛及臨川虞集豫章揭傒斯齊名人號爲儒林四
傑

宋濂撰行狀嘗著弔諸葛武侯辭劉君應龜見而
歎曰吾鄉以文辭鳴者喻叔奇兄弟爾稍加工不
與之抗衡乎因留受業從仙華山隱者方君鳳游
爲歌詩相倡和絕無仕進意
危素撰神道碑延祐元年貢舉法行縣長吏強起

就試作太極賦傳於世世之議者謂公操竹孤鶴
類陳履常文辭嚴簡類王介甫筆札俊逸類薛嗣
通

上京道中雜詩十二首

發大都

辭親獨行邁遙遙抵京國胡爲突不黔驅馬更遠適至尊
有時巡樹羽殷阡陌宿衛必近臣顧問須耆德陋儒亦何
知冗從同執戟草深原野青雨暗關塞黑寥寥盛年意眷
眷游子色一身萬人中敢不思努力

劉蕡祠堂

劉君古遺直祠堂在邱園嗟此豪傑窟文雄歎孤鸞平生
二三策匪徼明主恩瑣瑣談得失無乃市井言憑高一長

望若厭車馬喧微風過疏雨青山滿前軒陰晴倏異態浮
雲實無根悠悠千載心去去勿復論

居庸關

連山東北趨中斷忽如鑿萬古爭一門天險不可薄聖人
大無外善閉非鍵鑰車行已方軌關吏徒擊柝居民動成
市廬井互聯絡幽龜白雲聚石磴清泉落地雖臨要衝俗
乃近淳朴政須記桃源不必銘劍閣僕夫跼謂我無爲久
淹泊山川豈不好但恐風雨惡

榆林

崇崇道旁土云是古長城卻尋長城窟飲馬水不腥斯人
亦何幸生時屬休明向來邊陲地今見風塵清禾黍被行

路牛羊散郊垌儒臣忝載筆帝力猗難名

槍竿嶺

憶昔賜第歸吾母適初度蹉跎歲月晚今辰乃中路居人
誇具慶游子慙叱馭茲山稱最高揚鞭入煙霧矗矗多峭
峰濛濛饒雜樹崎嶇共攀援躑躅頻返顧陳情未成表登
高詎能賦獨憐山下水遠向盧溝去

李老谷

緣崖一徑微入谷雙崦窄密林日易曛况乃雲雨積行人
望煙火客舍依山色家僮爲張燈野老煩遊席未覺風俗
殊祇驚關河隔嚴程不可緩子規勿勸客

赤城

雞鳴秣吾馬晚飯山中行何以慰旅懷赤城有嘉名灘長
石齒齒樹細風泠泠時見巖壁間粲若丹砂明溫泉發其
陽撝訶勤百靈前峯指金閣眞境標殊庭白道人跡稀青
崖雲氣生信美無少留緬焉起深情

龍門

竦身望龍門緩轡行兀兀溪迴愁屢渡雨橫驚暴溢兩崖
儼相向百水怒爭出人言馬上郎快意每多失自非渥洼
種不得矜捷疾飄飄蟻蝨臣凜凜黿鼉窟皇靈重覆冒利
涉用終吉迴睨向所經千嶂隱朝日青林外盤紆黃流中
蕩潏後來未渠央君子宜戰栗

獨石

解鞍及亭午稍欣烟霧收蒼然衆山出歷歷如雕鏤前瞻
一石獨靈宮居上頭頗聞去年夏水激龍騰湫走避登屋
上夜半齊呀咻幸茲溪澗中今作清淺流宴安不可懷變
化誠難求翠華渺在望行矣毋淹留

擔子窪

自從始出關數日走崖谷迢迢度偏嶺險盡得平陸坡陀
皆土山高下紛起伏連天暗豐草不復見林木行人烟際
來牛羊雨中牧颯然衣裳單咫尺異寒燠伫立方有懷相
逢仍問俗畏途宜疾驅更傍灤河宿

李陵臺

日暮官道邊土室容小憩漢將安在哉荒臺猶髣髴低徊

爲之久懷古增歔歔長風吹曠野飛雨千里至蕭條蒼山
根草木餘爽氣常隣司馬公子奪多深意奏對實至情論
錄存大義史臣司述作遺則敢失墜

上都分院

晨興過桓州旭日生蒼涼舉頭見觚稜金碧何巍煌洪河
貫其前青山環四傍暮投玉堂署黿峰屹中央升階旅羣
彥官燭分餘光琴冊森在側談笑來清觴列坐無所爲陳
詩詠黃唐帝鄉豈不樂父母遠莫將起視雲漢低垂星爛
寒芒南飛有冥鴻邈哉天際翔

危素撰神道碑至順二年用馬文貞公之薦召爲
應奉翰林文字同知制誥扈從至開平作紀行詩
十有二篇世感傳之

許晉孫字伯昭建昌人延祐二年登進士第官至茶陵

州判官

句

至道難聞歲年晚聖賢不作後世亂

黃文獻集君筮仕後始學於臨川吳公每以及門晚爲憾其爲詩尚醞藉未病前一月夢爲詩云云詰旦語人曰吾詩詞意甚悲殆不類平生作

呂權字子義婺之永康人

句

青壁雖萬里白雲只三尋

黃文獻集天歷二年卒於家得年三十有八始君自書其夢中之語云云莫知何義至是以其年之修短驗之若有數然

韓性字明善紹興人延祐中憲府舉爲慈湖書院山長
受而不赴後卒賜諡莊節先生有五雲漫稿

句

月上影娥池人在衆香國

貞居詞王戲隱五香圖作圓象墨寫梅蘭水仙山
簪瑞香五品盤屈折枝於其中韓明善有二云云一
聯

丁復字仲容天台人延祐初游京師與楊載范梈同薦
入館閣不果有檜亭稿

醉歌贈雲心子陸華之

雲心子陸農師之子孫老來賣卜錢唐門搜元挾微孽混
淪進退五緯扶兩輪皞父及芒兒束手就律呂不敢差毫

分前身定是張博望老樹倒騎上崑崙投杼機上女飲牛
河畔人與之細說天地根却來人世三千歲君平朽骨呼
不聞功名富貴無足云祇談禍福開盲昏得錢沽酒和天
吞赤城有狂客十年江海看浪翻歸來黃塵中拭目驚見
君抵掌一長笑各拂頭上巾別時綠髮滴可染祇今雪滿
纈吳盆少者忽已老老者不復存政須日日醉倒湖邊尊
尊已倒還可酤不愁黃金盡但恐清旦無舉手招羲和低
頭喚天吳勸爾勿東逝止爾勿西徂西徂不可止東逝無
時已囑付酒家兒明當復來此

西湖志餘元時陸華之錢唐人以賣卜馳名且通文學籍紳多與之友天台丁仲容贈之歌云云

應夢

一作文

虎字彥文黃巖人

梅魂

禹廟歸來骨已靈
風林月落見儀形
玉龍一曲香隨返
彩鳳三招夢未醒
弔影西湖雲樹黑
斂粧東閣土花馨
莫誇賦客心如鐵
楚些淒酸可忍聽

浙江通志嘗游京師賦梅魂詩虞集楊載見之亟加歎賞稱爲應梅魂黃潛薦之不起人高其行

歐陽玄字原功瀏陽人延祐乙卯以鄉貢首薦登進士

第官至翰林學士承旨諡曰文有圭齋集

元史十歲部使者行縣玄以諸生見命賦梅花詩立成十首晚歸增至百首見者駭異之

宋學士集初虞文靖助教成均其父汲方教授於潭見公文大驚手封一帙寄文靖謂他日必與並

駕齊驅由是文靖薦公升朝

題僧墨菊卷

苾芻元是黑衣郎當代深仁始賜黃今日黃花翻潑墨
來面目見馨香

七修類稿僧舊著黑衣元文宗寵愛笑隱賜以黃衣其徒後皆衣黃歐陽原功題僧墨菊詩云云

許有壬字可用湯陰人登延祐二年進士第官至中書

左丞諡文忠有圭塘小稿

和可行赴圭塘

卜築何如履道坊千紅萬綠浸銀塘要回衰境爲全盛却
使閒人號最忙活水清園容膝屋新篁高出及肩牆煙霞
遮斷塵埃路才覺山林白晝長

圭塘欸乃集周伯琦序圭塘欸乃者御史中丞安陽許公與其季氏都司君可行其客馬君君明初及君之冢嗣國子舍生楨閒居唱和之作也公謝事歸相州於其第之西二里得康氏廢園薙灌莽

剡菑翳鑿池其中袤廣以步計者千餘深八尺形如桓圭雙洲右枕孤塢左峙夷堤緣焉回垣繚焉夫渠楊柳棗栗桑榆梅榴桃李蒼松翠竹繁華豐草周于池之外蓋培植踰年而後成惟二古檜巋然乃康氏故物公時杖屨攜弟若子會賓友觴咏其間以池之占勝居多故以圭塘名此倡彼和乃若漁歌互答然

洪震老字復翁淳安人延祐中領鄉薦官州學正學者稱石峯先生

句

通都大邑人爭馳一泉一石小亦奇雲深路絕無人處縱有佳山誰得知

升庵詩話元遺山北嶽詩東州死愛華不注向在陋邦何足數敬亭不著謝宣城斷岸何緣比天姥言山水在通都易得名也洪震老元人淳安東泉山詩云云言山水在僻遠人不知也三詩意絕相

類亦名言也

辛鈞字 東平路人延祐間知單州官至嶺南廣西

道肅政廉訪使

遺直軒詩

一家兄弟兩詩仙同在蠻邦豈偶然今日開軒見遺像當時美政亦相聯

山堂肆考遺直軒在雷州西湖近蘇公樓元辛鈞詩云云

陳繹曾字伯敷 人官國子助教

案元史列傳云處州人而靜春堂詩集後序自稱吳興陳繹曾

句

處士近來恩例別麻鞋一對當蒲輪

山居新話因話錄云昔有德音搜訪懷才抱器不求聞達者有人逢一諸生奔馳入京問求何事答曰將應不求聞達科因念延祐間陳伯敷繹曾到都每見晦跡邱園者數多奔競遂有二云之譏

韓信同字古遺甯德人延祐四年應鄉舉不合歸

題岳王墓

妖星墜地芒角赤劍龍悲吼國蕭瑟中原王氣挽不回將
軍一死如毛擲秦家小兒真戲劇播弄造化搖樞極指誓
爲親忠且逆隻手上遮天眼碧九重茫茫隔天日無由下
燭臣愚直臣愚萬死不足惜國恥未湔猶憤激古墳埋冤
血空瀝風雨年年土花蝕我恐精忠埋不得白日英魂土
中泣請將衰骨斲出荒苔痕獻作吾王補天石

筆精古今題岳王墓者多矣元季韓古遺一篇岳
集未收差有溫李之調詩云云

汪澤民字叔志婺源人登延祐戊午進士第官至禮部
尚書致仕長槍賊起執不屈死諡文節有宛陵遺

集

句

及瓜當此日行李似來時

梧溪集嘗推官平江任法恕允獄多平反垂代題
春帖云云迨今爲實錄

吳萊字立夫浦陽人延祐七年有司以春秋薦下第後
薦爲書院山長未行卒私諡淵顯先生有淵顯集

浦陽人物記族父幼敏家多書私取讀之幼敏竊
窺漢書也指谷永杜鄴傳謂曰能誦貸汝爵立夫
琅然誦之三易他編皆如初方鳳見而歎曰汝南
應世叔不是過也晚自號深慶山道人因稱深
慶先生

宋學士集東經齊魯梁楚之郊北抵燕每遇中原

奇絕處昔人歌舞戰爭之地貫酒高歌自謂綽有
司馬子長遺風遊海東洲歷蛟門峽過小白華山
登盤陀石著觀曰賦以見志至元六年先生年四
十四棲遲祗席忽夢作童汪騎贊覺謂人曰汪騎
騶者也今歲殆不起耶竟卒於家當其賦詠捷如
風雨一日於故人家見几上堆刻紙數十番戲爲
長歌頃刻而盡屬對嚴巧文采綉麗觀者驚以爲
神

淵穎先生集胡翰序其擬論曰本書蓋其十八時
所作也人謂其有終軍王褒之風
林泉隨筆吳立夫論倭書規模倣司馬相如論蜀
文其末所述論其王之言雖古之辨士莫能過也
其他大游觀曰兩賦與夫形釋泰誓論補牛尾歌
辭等篇皆雄深卓絕

西域種羊皮書褥歌寄李仲羽

波斯谷中神夜語波斯牧羊俱雜虜當道剗刀羊可食土
城留種羊脰骨四圍築場聞杵聲羊子還從脰骨生青草
叢抽臍未斷馬蹄踏鐵繞垣行羊子跳踉却在草鼠王如

拳不同老飫肉筵開塞饌肥裁皮襜作書林寶南州俠客
遇西人昔得手襜令無倫君不見水蠶之錦欲盈尺康洽
年來貧不貧

樂郊私語楚石大師爲沙門尊宿嘗從上都大漠迤西
北懷古諸作余嘗讀其自言羊可種不信爾成絲
之句疑以爲羊可種乎因以問師師曰大漠迤西
俗能種羊凡屠羊用其皮肉惟留骨以初冬未日
埋着地中至春陽季月上未日爲吹笳呪語有子
羊從土中出凡埋骨一具可得羊數隻此蓋四生
胎外之化也亦不足怪特非中國所有致生疑耳
後讀浦江吳立夫西域種羊皮書得歌云云此又
云以脛骨種之與琦師目見之者不同也蓋波斯
國別有種法如吳詩所云耳

題趙大年林塘秋晚圖

老景青黃筆底收晴鳥冷雁共汀洲王孫畫學空花竹不
到銅駝陌上秋

筆精元吳淵題趙大年林塘秋晚圖云云譏刺之意微而婉矣

張翔字雄飛西河人官湖南廉訪使僉事

岳陽樓

樓上元龍氣不除湖中范蠡意何如西風萬里一黃鵠秋水半江雙白魚鼓瑟至今悲二女沈沙何處弔三閭朗吟仙子無人識騎鶴吹簫下碧虛

升庵詩話余昔過岳陽樓見一詩云云視其姓名則元人張翔字雄飛不知何地人也雄飛在元不著詩名然此詩實可傳同時虞伯生范德機皆有岳陽樓詩遠不及也

趙雍字仲穆孟頫仲子以蔭守昌國海甯三州官至翰林院待制

古詩

林院待制

西風聲蕭蕭愁來如夢寐鄉關萬里遙兄弟何時會遲此
相見期真以日爲歲別來經八霜朱顏久憔悴人生宇宙
間名利何足計何如雲中鶴翱翔隨所至

又

我居水精宮遠游來朔方離家近十載兄弟遙相望始見
世情薄紛紛名利場富貴不可期人生難忖量乾坤本無
私江山歎興亡蟬聲噪落日露草啼寒螿明月如有情照
我肝與腸西風動林末蕭然秋意涼回首歲云暮信美非
吾鄉展轉復展轉愁多知夜長

思歸

嫋嫋秋風動客懷啾啾猿鶴苦相催魯侯不遇關天意賦

氏焉能沮我才
萬里驅馳離鄉國
十年奔走在塵埃
吳興山水何清遠
一棹扁舟歸去來

趙待制遺稿延祐六年春正月寄呈德璉姊丈一觀翼改抹幸甚書於大都咸宜里之寓舍趙雍又文徵明跋楷行間作轉益妍美德璉姊丈蓋魏公長倩王國器也國器長於今樂府楊鐵崖亟稱之故此卷所書樂府爲多豈亦因其所好耶又許初跋所書艷詞特多或偶興爾閒如古詩二篇思歸一律頗以孤忠自許紛華是薄而興亡骨肉之感默寓其中意其父子之仕當時亦有不得已者良可悲已

葉森字景修錢塘人早從貞白先生游後登趙松雪之門

題陳渭叟紫雲編

一度詩來一見君
只應芳杜襲蘭薰
有時寫到游仙句
繞

筆秋香生紫雲

西湖志餘陳渭叟賦詩有天然趣隱居葛溪上歲一來杭城中名人勝士爭要致之惟恐其去也所著有紫雲編葉森爲之類集復題詩云云

鄭采字季亮溫之平陽人

題復古秋山對月圖

天瑟瑟兮月朐朐山岵岵兮水瑟瑟木森森兮竹篠篠勢

森森兮墨黼黼

清河書畫舫題語甚奇走筆錄之

鄭禧字天趣永嘉人進士官黃巖州同知

悼亡吟二首

特寫青箋幾往來佳人何自苦憐才傷心春與花俱盡啼

殺流鶯喚不回

相見愁無奈相思自有緣死生俱夢幻來往只詩篇玉珮
驚沈水瑤琴愴斷弦傷心數行淚盡日落花前

春夢錄城之西有吳氏女才色俱麗其父早世治
命宜以爲儒家室余今年客于洪府一日媒姬來
言女家久擇婿難其人洪仲明公子戲欲與余求
之余辭云已娶媒姬欲求余詩詞達于女氏余戲
賦木蘭花慢一闕一日女和前詞附媒姬至乃曰
吳氏之族見此詞喜稱文士之美但母氏謂官人
已娶而不可然女獨賡唱迭和意欲雖居二室亦
不辭也有周氏子挾財以媚母氏母遂納其定禮
女號泣曰父臨終命歸儒生周子不學無術但能
琵琶耳我誓不往周氏因伴狂擲冠於地母怒歐
之女發憤成疾病且篤母乃大悔然女病竟無起
色未幾卒今具錄往來詞翰於後覽者亦必昭余
之悽愴也延祐戊午永嘉鄭禧天趣序丁巳歲二
月廿六日余寄木蘭花慢云云三月一日賦詩三
首云云吳氏和云云吳氏既終余悼亡吟云云

黃敏字子侑

悼吳氏

春樓珠箔捲東風幾度偷彈淚粉紅豔質豈期黃壤隔香
魂應逐綵雲空解將遺事留身後盡忘前言在耳中杏蕊
梅花俱一夢悠悠深恨鎖幽宮

汪子才字庭材

悼吳氏

犀心兔穎屢通津未識嫦娥一面新興盡故園梅已謝情
留別塢杏初春將身輕許志雖失在耳不忘言可遵生死
幽冥千古恨臨風披閱爲傷情

徐天資字子文

和黃韻

杏花初破怯春風未識芳心一點紅詞翰往來傳意密死
生夢幻轉頭空素知分淺鴛幃裏預許名題雁塔中杳杳
幽魂何處覓眞華消息報仙宮

沈君清

和黃韻

落花一掃夜來風枉駕相思寄斷紅梅信日聞魚水遠杏
香還逐燕泥空情懷琴瑟千春恨怨入琵琶一夢中門掩
滿庭詩思遠令人惆悵館娃宮

春夢錄吳氏既終友人共閱此女詞情事迹可傷
作詩悼之黃子伯敏云云汪庭材子才云云徐子
文天寶和黃韻云云先生沈君清和黃韻云云
案餘詳鄭禧下

孫鳳洲

贈歐陽圭齋

圭齋還是舊圭齋不帶些兒官樣回若使他人居二品門
前車馬鬧如雷

綠雪亭雜言長沙有朝士某者還鄉意氣滿盈賓至則鼓吹喧闐闔里中有執友來謁之朝士曰翁素好誦詩近日誦得何詩執友曰近誦得孫鳳洲贈歐陽圭齋之詩甚有味乃朗然誦之云云朝士聞詩默然明日賓至門庭寂然

傅子建

句

龜鼉滄海賦龍馬赤文書

吳淵穎先生集去歲留杭德興傅子建夢得句云云間以語予及其鄉人董與幾

元詩紀事卷六

三

元詩紀事卷七

侯官陳衍緝

宋本字誠夫大都人至治元年爲廷試第一人賜進士及第官至國子祭酒諡正獻有至治集

西湖竹枝集弟襲泰定甲子登第時比之宋二宋云

舶上謠送伯庸

以番貨事奉使閩浙

舊時家近黑橋街三十餘年不往來憑仗使君一問訊楊梅銀杏幾回開

元文類原注余以至元廿六年出杭故君東廂隅四條巷旁有橋名黑橋居有楊梅銀杏二樹在巨井上園

吳師道字正傳婺州蘭溪人登至治元年進士第官至

禮部郎中有禮部集

集句贈潘季通

江上春風送客舟
鳥啼花落水空流
勸君更盡一杯酒
與爾同消萬古愁

月山詩話元吳師道集句勸君二云云極工明安公石集句亦以二語爲對當是偶同耳

句

庭下已生書帶草
馬頭初見米囊花

吳禮部詩話舊作集句用東坡二云云對唐人二云云以爲的切近閱張祐詩有二云碧抽書帶草紅節米囊花已有此句矣

三寶柱宇廷珪色
目人登至治元年右榜進士第

題門屏

逆刮蛟龍鱗順捋虎豹尾若將二伎論尤比干人易

輟耕錄三寶柱頗以才學知名雖湛於酒色而能練達吏事剛正有守爲浙省郎中曰大書四句於門屏之上云云其意蓋以杜絕人之求請耳

宋瑛字顯夫大都人擢泰定甲子進士第官至翰林直學士有燕石集

句

行人不敢來飲馬稚子時能坐釣魚

山居新話國朝有禁御溝不許洗手飲馬留守司差人巡視犯者有罪故宋顯夫御溝詩有二云可謂紀實矣

呂思誠字仲實平定州人擢泰定元年進士第官至中書左丞諡忠肅有仲實集

寄內

自從馬上苦思卿一個窮家兩手擎少米無柴休懊惱大
男小女好看成恩深夫婦情何極道合君臣義更明早晚
太平遂歸計連杯共飲話離情

水東曰記呂忠肅公思誠耿恒庵尚書曾祖妣之
兄也天順四年予過南都飲尚書太平里第尚書
因誦公寄內詩云云大抵公之詩情真語切要亦
出元白云

戲作

典却春衫辦早廚老妻何必更躊躇瓶中有醋堪燒菜囊
裏無錢莫買魚不敢妄爲些小事只因曾讀數行書嚴霜
烈日皆經過次第春風到草廬

輟耕錄呂仲實先生未顯時一日晨炊不繼欲携
布袍買米於人室氏有客色因戲作一詩云云後

果及第

廖毅字宏道建康人

伍王廟

浩浩凌雲志巍巍報國心思魂與潮汐萬古不消沈

錄鬼簿泰定三年丙寅春因余友周仲彬與之會
即敘平生懽時出一二舊作皆不凡俗天歷二年
春抱疾喪於友人江漢卿家公能書善行文不草
率題伍王廟壁有折桂令一曲及有絕句云云其
感慨激烈徒增悵快噫天之生物也裁成輔相以
左右民奈何如是之偏戾也

陸居仁字宅之華亭人中泰定三年鄉試隱居教授自
號巢松翁瑁湖居士有雲松野褐集

楚人弓

楚人弓懸兩石五十萬矢陷強敵絳人弓箭三隻長歌入

元詩紀事卷七

三

關成偉績多箭不如少箭力制敵若在弓矢間鳴條牧馬
高於山

列朝詩集鐵雅評曰史斷入詩箴警多矣

李黼字子威潁人泰定四年以明經魁多士授翰林修
撰官至江州路總管盜起城陷死之諡忠文

感事

彌勒何神孕禍胎經魑動地起風埃煙銷郡國民生苦而
染江淮鬼物哀人世百年遭此厄天戈萬里幾時來石田
也有藍田玉可惜同成一炬灰

草木子李黼守江州曰妖寇彭和尚攻之城陷死
之先城未陷時嘗有詩云云

薩都刺字天錫別號直齋本答失蠻氏後爲雁門人登

泰定丁卯進士第官至河北廉訪司經歷有雁門集

列朝詩集方谷珍盛時招延士大夫折節好文與吳中爭勝文人遺老如林彬薩天錫輩咸往依焉
送欣上人笑隱住龍翔寺

江南隱者人不識一日聲名動九重地濕厭看天竺雨月
明來聽景陽鐘衲衣香暖留春廚石鉢雲寒臥夜龍何日
相從陪杖屨秋風江上採芙蓉

閒中今古錄薩天錫嘗有一詩送潛天淵入朝地濕厭聞天竺雨云云聞者無不膾炙惟山東有一叟鄙之公以素懷意訪問其故叟曰此聯措詞固善但聞字與聽字合耳公曰當以何字易之叟徐曰看天竺雨公詰其看字叟曰唐人有林下老僧來看雨公俯首拜爲一字師

案今古錄作送天淵雁門集作送笑隱今題從雁門集

紀事

當年鐵馬遊沙漠萬里歸來會二龍周氏君臣空守信漢
家兄弟不相容只知奉璽傳三讓豈料游魂隔九重天上
武皇亦灑淚世間骨肉可相逢

歸田詩話薩天錫以宮詞得名其詩清新綺麗大
率相類惟紀事一首直言時事不諱云云蓋泰定
帝崩於上都文宗自江陵入據大都而兄周王遠
在沙漠乃權攝位而遣使迎之下詔四方云謹俟
大兄之至以遂固讓之心及周王至迎見於上都
歡宴一夕暴卒復下詔曰夫何相見之頃宮車弗
駕加諡明宗文宗遂即真皆武宗子也故末句云
然

玉華宮監禮詠事

大禘天香出內宮孝思與世總無窮百年禮樂行三獻一
派笙韶起半空使者領班雲氣裏女仙搖珮月明中小臣

監禮陪清列兩袖葵花映燭紅

河朔訪古記玉華宮在眞定路城中衙城之北潭園之東是爲睿宗仁聖景襄皇帝之神御殿奉安御容者也華麗擬於宮掖制命羽流崇奉香燈歲時月日中書以故事奏聞命集賢院臣代祀函香致體遣太常雅樂具朝服備牲牢行三獻之禮元統乙亥監禮官薩都拉天錫有詩詠其事云云

宮詞

深夜宮車出建章紫衣小隊兩三行石闌干畔銀燈過照見芙蓉葉上霜

京城春日

燕姬白馬青絲韁短鞭窄袖銀鐙光御溝飲馬不回首貪看柳花飛過牆

山居新話薩都刺宮詞云云人莫不膾炙之予以爲擬宋宮詞則可蓋北地無芙蓉宮中無石闌干

擊執宮人紫衣大朝賀則於侍儀司法物庫關用
平日則無有也宮車夜出恐無此理又云云國朝
有禁御溝不許洗手飲馬

彭城雜詠

雪白楊花撲馬頭行人春盡過徐州夜深一片城頭月曾
照張家燕子樓

歸田詩話亦脫灑可誦

芙蓉曲

秋江渺渺芙蓉芳秋江女兒將斷腸絳袍春淺護雲暖翠
袖日暮迎風涼鯉魚吹浪江波白霜落洞庭飛木葉盪舟
何處采蓮人愛惜芙蓉好顏色

西湖竹枝集其詩風流俊爽修本朝家範宮詞芙
蓉曲雖王建張籍無以過矣

蝦助詩

層濤濡沫綴蝦行水母含秋孕地靈海氣凍成紅玉脆天
風寒結紫雲腥霞衣褪色脂流滑瓊縷烹香酒力醒疑是
楚江萍實老誤隨潮汐落滄溟

七修類稿右蝦助詩乃元薩天錫作也薩詩予家
所藏可謂全矣亦失此律况膾炙人口特書之

燕姬曲

燕京女兒十六七顏如花紅眼如漆蘭香滿路馬塵飛翠
袖籠鞭嬌欲滴春風淡蕩搖春心錦箏銀燭高堂深繡衾
不暖錦鴛夢紫簾垂霧天沈沈芳年誰惜去如水春困著
人倦梳洗夜來小雨潤天街滿院楊花飛不起

過嘉興

三山雲海幾千里十幅蒲帆挂煙水吳中過客莫思家江
南畫船如屋裏蘆芽短短穿碧沙船頭鯉魚吹浪花吳姬
盪槳入城去細雨小寒生綠紗我歌水調無人續江上月
涼吹紫竹春風一曲鷓鴣吟花落鸞曉滿城綠

織女圖

一作題壽監司所藏美人織錦圖

蘭閨織錦秦川女大姬啞啞弄機杼小姬織倦何所思簾
幕無人燕雙語成都花發江水春門前馬嘶車鞦韆髻鬟
兩珥看欲墮蛾眉八字畫不伸良人一去無消息冰蠶吐
絲成五色柔腸九曲細於絲萬縷春愁正如織綺窗睡起
聞早鶯西樓月落金盤傾暖霞拂地海棠曉香雪潑戶梨
花晴日長深院機聲動梭影穿花飛小鳳水心驚起鴛鴦

飛花底不成蝴蝶夢纖纖玉指柔且和香鉤小鞵裁春羅
滿懷心事付流水遶日雲錦生層波佳人自古多命薄風
裏楊花隨處落豈知醜婦嫁田家生則同衾死同椁君不
聞長安市上花滿枝東家胡蝶西家飛籠中鸚鵡喚新主
門外侍兒更故衣又不聞田家婦日埽春蠶宵織布催租
縣吏夜打門荆釵布裙夫短袴我題此畫三嗟吁百年醜
好皆虛無排雲便欲叫閭闔爲我獻上豳風圖

贈劉雲江宗師

羽人推轉阿香車童子穿松拾翠華天上賜衣霑雨露山
中詩錦織雲霞瑤臺紫氣秋橫劍石室丹光夜走砂擬借
茅君三白鶴乘風騎到玉皇家

臺山懷古

一作越臺懷古

越王故國四圍山雲氣猶屯虎豹關
銅獸暗隨秋露泣海鴉多背夕陽還
一時人物風塵外千古英雄草莽間
日暮鷓鴣啼更急荒臺叢竹雨斑斑

三衢馬太守昂夫索題爛柯山石橋

洞口龍眠紫氣多登臨聊和采芝歌
爛柯仙子何年去鞭石神人此地過
烏鵲橫空秋有影銀河垂地水無波
遙知題柱凌雲客天近應聞織女梭

雁門集張習跋嘗觀天錫燕姬出過嘉興織錦圖等篇婉而麗切而暢雖雲石廉夫莫能道如贈雪江越臺懷古題爛柯山石橋諸律又和雅典重置諸松雪道園之間孰可疑異

句

客遇鐘鳴飯僧披御賜衣

七修類稿僧舊著黑衣元文宗寵愛欣笑隱賜以黃衣其徒後皆衣黃薩天錫贈笑隱詩云云正謂此也

楊維禎字廉夫號鐵崖會稽人登泰定丁卯進士第官

至江西等處儒學提舉有鐵崖古樂府等集

七修類稿廉夫母夢金鉤入懷而生

又其號鐵崖初居吾杭鐵冶嶺後號鐵笛至松江得莫冶所製鐵笛

列朝詩集張伯雨序其樂府云上法漢魏而出入

於少陵二李之間隱然有曠世金石聲又時出龍

鬼蛇神以眩蕩一世之耳目斯亦奇矣

又承學之徒流傳沿襲牙鉤棘號爲鐵體

又維禎疾亟撰歸全堂記頃刻而就曰九華伯潘

君迎我擲筆而逝

四友齋叢說吾松呂璜溪即開應奎文會者是也

走金帛聘四方能詩之士請楊鐵崖爲主考試畢

鐵崖第甲乙一時文士畢至傾動三吳

雲林遺事楊廉夫號好聲色一日與元鎮會飲友人家廉夫脫妓鞋置杯酒其中使坐客傳飲名曰鞋杯元鎮素有潔疾見之大怒翻案而起連呼齷齪而去

山堂肆考元楊鐵崖在松江嘗游盤龍塘夜抵普門寺宿盜伺其出盡竊所蓄物黎明家人往白之先生賦詩不輟諸客曰老鐵在是區區長物又奚足恤

揮塵詩話楊鐵崖在金粟道人家每食主人必出佳釀以芙蓉金盤令美妓捧勸鐵崖出對曰芙蓉盤捧金莖露有能對者贈以此盤一妓應聲曰楊柳人吹鐵笛風遂以盤酬之一坐傾倒

西湖竹枝歌九首

并序

予閒居西湖者七八年與茅山外史張貞居茗溪郊九成輩爲唱和交水光山色浸沈胸次洗一時尊俎粉黛之習於是乎有竹枝之聲好事者流布南北名人韻士屬和者無慮百家道揚諷諭古人之教廣矣

是風一變賢妃貞婦興國顯家而烈女傳作矣采風
謠者其可忽諸至正八年秋七月會稽楊維禎書於

玉山草堂

蘇小門前花滿株蘇公堤上女當壚南宮北使須到此江
南西湖天下無

鹿頭湖船唱

郎一作片言許郎金石剛

船頭

一作阿奴

不宿

一作是

野鴛

鴛爲郎歌舞爲郎死不惜黃金成斗量

家住西湖新婦磯勸君不唱縷金衣琵琶元是韓朋木彈

得鴛鴦一處飛

湖口樓船

一作行雲

湖日陰湖中斷橋湖水深樓船

一作行雲

無柁

一作心

是郎意斷橋有柱是儂心

病春日日可如何起向西窗理琵琶見說枯槽能卜命柳
州街口問來婆
小小渡船如缺瓜船中少婦竹枝歌歌聲唱入空侯調不
遣狂夫橫渡河
勸郎莫上南高峯勸儂莫上北高峯南高峯雲北高雨雲
雨相催愁殺儂
石新婦下水連空飛來峯前山萬重不辭妾作望夫石望
來或似飛來峯
望夫一朝又一朝信郎信似浙江潮浙江潮信有時失臂
上守宮無日消

歸田詩話西湖竹枝詞楊廉夫爲倡和者甚衆皆
詠湖山之勝人物之美而寓情於中大率一律

麓堂詩話詩貴意意貴遠不貴近貴淡不貴濃如
杜子美鉤簾宿鷺起云云李太白桃花流水杳然
去云云王摩詰返景入深林云云皆可與知者道
難與俗人言王介甫得之曰坐看蒼苔色欲上人
衣來虞伯生得之曰不及清江轉花鼓洗盞船頭
沙鳥鳴曰繡畫美人時共看堦前青草落花多楊
廉夫得之曰南高峰雲北高雨雲雨相隨愁殺儂
可謂閉門造車出門合轍者矣

鴻門會

天迷關地迷戶東龍白日西龍雨撞鐘飲酒愁海翻碧火
吹巢雙狹狺照天萬古無二鳥殘星破月開天餘座中有
客天子氣左股七十二子連明珠軍聲十萬振屋瓦拔劍
當人面如赭將軍下馬力拔山氣卷黃河酒中瀉劍光上
天寒彗殘明朝畫地分河山將軍呼龍將客走石破青天
撞玉斗

蓬窗日錄謝臯羽詩余尤愛其鴻門讌一篇云云李賀集中亦有鴻門讌一篇不及此遠甚可謂青出於藍矣元楊廉夫樂府力追李賀亦有此篇愈不及臯羽矣

佛頂菊

迺社淵明手自栽頭顱終不惹塵埃東籬若爲摩挲看西域親曾受記來妙色盡從枝上發慧香直奔腦門開明年九月重陽節再托摩耶聖母胎

七修類稿元人謝伯理居松之泖湖富而好禮構光祿亭爲宴樂之所九日會友於其間有園丁以佛頂菊花方開獻之筵間求詩衆爲賦之時鐵笛道人楊廉夫在座走筆云云座客顧仲瑛奉觴稱曰先生之作誠可謂虎穴得子矣

王烈婦詩

介馬馱馱百里程青楓一夜血詩成祇應劉阮桃花水不

似巴陵漢水清

南漳詩話宋王烈婦青嵐嶺事昭灼在人耳目士大夫過而題詩者甚衆楊廉夫詩云云後廉夫得夢悔之乃更作詩有寧從湘瑟聲中死不向胡笳拍裏生之句則與前詩迥不侔矣

改作

天隨地老妾隨兵天地無情妾有情指血誓開雲嶠赤苔痕化作雪江清願從湘瑟聲中死不逐胡笳拍裏生三月子規啼斷血秋風無淚寫哀銘

高坡異纂楊廉夫題臨海王節婦詩云云後廉夫無子一夕夢一婦人謂曰爾知所以無後乎曰不知婦人曰爾憶題王節婦詩乎爾雖不能損節婦之名而心則傷於刻薄毀謗節義其罪至重故天絕爾後廉夫既寤大悔遂更作詩云云後復夢婦人來謝未幾果得一子

題劉阮山

兩堦原非薄倖郎仙姬已識姓名香問渠何事歸來早白
首糟糠不下堂

南濠詩話元微之題劉阮山詩云云後元遺山詩云云予頃見楊廉夫詩蹟亦有是作云云較之二元情致不及而忠厚過之

題宋宮觀潮圖

八月十八睡龍死海龜夜食羅刹水須臾海劈龜赭門地
捲銀濤薄於紙艮山移來天子宮宮前一箭隨西風劫灰
欲洗蛇鬼穴婆留朽鐵猶爭雄望海樓頭誇景好斷釐已
走金銀島天吳一夜海水移馬蹀沙田食沙草崖山樓船
歸不歸七歲呱呱啼軼道

七修續稿嘗於先輩葉南屏家見元人題宋宮觀潮圖詩皆雄富雅健感慨悲壯因假回錄之楊維

禎詩云云練川嚴恭出宋宮觀潮圖索余詩爲首
唱且曰得奇語始可抗浙江之奇觀繼遣金露澆
渴穎飲酣爲之吐錦紫句時至正廿年秋八月初
楊維禎在元白亭試奎章龍香寶劑書

大暑譙朱氏玉井香賦詩

朱公神仙人冰雪照肺腑祖帑閱羽化祖書在冊府門掩
一畝宮虹梁跨風渚喬木八九株梧桐雜槐櫟中有玉井
香銀雲灑零雨俗士不必來佳朋來不拒煮茶不無童謀
酒自有婦核破玉刃霜桃大簫卷金莖露上聲方響歌洞仙
自題舞魔女梧溪斥琴操主者極能評詩謂梧溪子擬琴
海嶽訂畫譜米老爲書棹歌發復留冰花涼欲語焉知人
間世大火虐如虎

好古堂書畫記楊鐵崖書一軸云至正景午大暑
譙於朱氏玉井香賦詩十有二韻書似西枝玉海

鶴屋三才子共和之二云云箕尾叟在草元閣書東
魯先生攷校

元夕與婦飲

問夜夜何其
睽茲燈火夕
月出屋東頭
照見琴與冊
老婦紀節序
清夜羅酒席
右蠻舞裊裊
左瓊歌昔昔
婦起勸我酒
壽我歲千百
仰唾天上蜍
誓作酒中魄
勸君飲此酒
呼月爲酒客
婦言自可聽
爲之浮大白

鐵網珊瑚老婦曰人言天孫思妃不如月娥守孤不知羿婦相棄以奔易若織女相望以久之愈也

漫興七首

并序

學杜者必先得其性情語言而後可得其性情語言
必自其漫興始錢唐諸子喜誦子唐風取其去杜不
遠也故今漫興之作將與學杜者言也

醴畫溪頭翠水家水邊短竹夾桃花春風喚人狂無那走
覓南鄰羯鼓撾

丈人接羅白氈裁花邊下馬不驚猜環沈溪頭買酒去高
堂寺裏看碑來

長城女兒雙結了陳皇宅前第一家生來不識古井怨唱
得後主後庭花

楊花白白緜初迸梅子青青核未生大婦當壚冠似瓠小
姑喫酒口如櫻

今朝天氣清明好江上亂花無數開野老殷勤送花至一
雙蝴蝶趁人來

南鄰酒伴辱相呼共訪城東舊酒壚柳下秋千閒絡索花

間喚起勸胡盧

我愛東湖舊廣文更過水口覓將軍醉歸嘗騎廣文馬不

怕打鼓噤黃昏

麗堂詩話杜子美漫興諸絕句有古竹枝意韓退之亦有之楊廉夫十二首非近代作也蓋廉夫深於樂府當所得意若有神助但恃才縱筆多率易而作

席上作

江南處處烽煙起海上年年御酒來如此烽煙如此酒老
夫懷抱幾時開

遵聞錄張士誠以厚幣招楊廉夫甚急勉行至姑蘇適元以龍衣御酒賜士誠廉夫因飲御酒遂作詩云云士誠聞之默然遂不强留

辭召命詩

天子來徵老秀才秀才嬾下讀書臺商山肯爲秦嬰出黃
石終期孺子來太守免勞堂下拜使臣且向日邊回袖中
一管春秋筆不爲旁人取次裁

七修類稿張士誠開宏文館固延致之廉夫心知其異圖也至無一字一語終曰酒酣臥睡一日朝廷頒酒於士誠廉夫以指寫塵桌一絕云云張見之知終不就遂放歸至天朝革命又令近臣促入京師廉夫托疾固辭知不可得也作詩縊死其詩云云二詩事熟誦人口然考貝廷臣所作之傳則廉夫於士誠處未嘗到也曾獻五論并復書直詆所用非人洪武三年正月又嘗至京師有疾回或者廷臣之傳尚當信也

老客婦謠

老客婦老客婦行年七十又一九少年嫁夫甚分明夫死
猶存舊箕帚南山阿妹北山姨勸我再嫁我力辭涉江采

蓮上山采靡采蓮采靡可以療饑夜來道過娼門首娼門
蕭然驚老醜老醜自有能養身萬兩黃金在纖手上天織
得雲錦章繡成願補舜衣裳舜衣裳爲妾佩古意揚清光
辨妾不是邯鄲娼

藝苑卮言高皇帝徵廉夫脩元史欲官之廉夫作
老客婦示不屈乃放之歸

鍾山詩

鍾山千仞楚天西玉柱曾經御筆題雲護金陵龍虎壯月
明珠樹鳳凰棲氣吞江海三山小勢壓乾坤五嶽低願效
華封陳敬祝萬年聖壽與天齊

七修類稿太祖初召楊廉夫見令賦鍾山詩援筆
立就云云太祖曰此詩值一千贊今日庶事方殷
姑賜五百贊過日

無題效商隱體

二月皇都花滿城，美人多病苦多情。
一雙孔雀行瑤圃，十二飛鳴上錦箏。
酒擲真珠傳玉掌，羹分甘露倒銀罍。
不堪容易少年老，爭遣狂夫作後生。

天街如水夜初涼，照室銅盤璧月光。
別院三千紅芍藥，洞房七十紫鴛鴦。
繡靴蹋踣句驪樣，羅帕垂鸞女直妝。
願汝康強好眠食，百年歡笑未渠央。

句

公子銀瓶分汗酒，佳人金勝翦春花。
金埒近收青海駿，錦籠初教雪衣娘。
小洞桃花落香雪，大堤楊柳舞晴煙。

歸田詩話楊廉夫詩云云又云云又公子云云皆言宴賞游樂之意亦其平生性格所好也

句

安危豈料關天步生死猶能繫俗情

歸田詩話詩社以楊妃襪爲題楊廉夫一聯云云
題目雖小而議論甚大所以諸人莫能及

胡善字師善紹興諸暨人泰定進士

句

領檄來司教臨危要致身

輟耕錄至正乙未以憲僉趙公舉爲松江儒學經
師越明年苗寇至欲燬孔子廟善坐經席罵寇寇
怒殺之先是善題詩於壁云云及難死果不誣

焦文炯字仲明淮陽人

夜直

憶昨停驂便殿西柳溝風軟絮霑泥一彎月子梨花上冷

浸香雲伴鳥棲

梧溪集右社稷署奉禮郎焦君追念先朝眷遇之隆而作也少由文皇東宮時說書爲前職而卒白君之次子曰誦其詩手寫詩意圖

幹玉倫都字克莊

道園學古錄奎章閣典籤玉倫都嘗以禮記舉進士從予戒均於閣下又爲僚焉

又幹君克莊曰人樵於山我樵於海海無木俟有浮槎斷梗至吾前者取之故自命海樵子

訪周古象不遇留題

事親未必可曾參戰分當爲每愧心今風來飄忽動抱

琴更入白雲深

中洲野錄周古象蘄水人生元末事親孝遭喪亂入贅於淮不見笑容妻詰之告以故遂歸尋母葬之廬墓二年妻亡終身不娶淮西僉事幹克莊求見不遇留題云云復爲立孝里門

甘立字允從大梁人辟為奎章閣史至丞相掾卒

夜烏啼曲

月落城上樓烏啼樓上頭一啼海色動再啼朝景浮馬鳴黃金勒霜滿翠羽裘烏啼在何處人生多去留

西湖竹枝集平日學文自負為臺閣體詩善鍊飭脫去凡近其夜烏啼曲可配古樂府云

柯九思字敬仲仙居人蔭補華亭尉不就官至學士院

鑒書博士自號丹邱生有丹邱生稿

宮詩十五首

萬國貢珍陳玉陛九寶傳贊卷珠簾大明前殿筵初秩勳

貴先陳祖訓嚴凡大宴世臣掌金匱之書必陳祖宗大札撤以為訓

黑河萬里連沙漠世祖深思創業艱數尺闌干護春草丹

墀留與子孫看

世祖建大內命移沙漠莎草於丹墀示子孫毋忘草地也

親王上璽宴西宮聖祚中興慶會同爭捲珠簾齊仰聖瑞

雲捧日御天中

天歷元年十二月二十七日篤恰帖木兒怯薛第二日寶房內對速古兒赤明里董

阿平章月魯不花右丞大都赤哈刺八典瑞院官古寶兒同僉答失蠻經歷柯都事奏十月二十

三日上都送寶來的時分興聖殿御宴其間有五色祥雲捧曰當殿本院官院判鄭立經歷張符都事柯九思等與

衆於殿前一同仰觀郁郁紛紛非霧非煙委係卿雲現似這般祥瑞應時呵如今與省家文書行移國史院標寫入

史呵怎生奉聖旨您每行文書者

四海昇平一事無常參已散集諸儒傳宣羣玉看名畫先

進開元納諫圖

凡御覽法書名畫羣玉內史掌之

萬里名王盡入朝法宮置酒奏簫韶千官一色真珠襖寶

帶攢裝穩稱腰

凡諸侯王及外番來朝必錫宴以見之國語謂之質孫宴質孫漢言一色言其衣服

元詩紀事卷七

七

皆一色也

官家明日慶生辰準備龍衣熨帖新奉御進呈先取旨隋

珠錯落間奇珍

御服多以大珠盤龍形嵌以奇珍曰鴉忽曰喇者出自西域有直數十萬定者

傳宣太府頒宮錦近侍承恩拜楊前製得袍成天未曉著

來香殿賀新年

臘前分賜近臣襖材謂之拜年段子

鳳城女樂擁祥煙

梵座

春游浹管弦齊望綵樓呼萬歲

黃止在五雲邊

故事二月十五日迎帝師游皇城宮中結綵樓親觀之

花明畫錦柳搖絲仙島陪鑾濯禊時曲水番成飛瀑下透

迤銀漢接清池

故事上巳節錫宴於萬歲山

儒臣春值奎章閣玉陛牙牌報未時仙仗已廻東內去杜

丹花畔得圍棋

上日御奎章報未時則還內殿矣

玉腕調冰湧雪花金絲纏扇繡紅紗綵箋御製題端午勅

送皇姑公主家

皇姑者魯國大長公主皇后之母也天歷二年端午上賜甚厚并御詩送之

觀蓮太液泛蘭橈翡翠鴛鴦戲碧荇說與小娃牢記取御

衫繡作滿池嬌

天歷間御衣多爲池塘小景名曰滿池嬌

珠宮錫宴慶迎祥麗日初隨綵線長太史院官新進歷楊

前一賜諸王

每歲日南至太史進來歲歷曰

元戎承命獵郊坰勅賜新羅白海青得雋歸來如奏凱天

鵝馳送入宮庭

海青者海東俊鵠也白者尤貴有數十金者

玉漏藏機水暗流眞珠射日動燈球偶人自解開青瑣高

拱龍床報曉籌

大明殿有燈漏飾以眞珠內爲機軸以小木偶人十二捧十二相屬每辰初刻偶人

相代開小門出燈外板上直御床立捧辰所屬以報時

西湖竹枝集宮詞追王建墨竹法文湖州名重當時云

梧溪集題柯博士敬仲宮詞後帝作奎章擬石渠花明長日幸鑾輿丹邱詞氣凌司馬封禪何如諫獵書

題畫二首

春濃不放小禽棲白髮衝冠向曉啼簾幕半開人未起樓
臺風暖日猶低
春風嬌軟綠陰肥上苑鶯花紫翠圍却向後宮深院裏一
枝閒自理金衣

南濠詩話柯博士九思在奎章曰得出入內廷後失寵退居吳下虞文靖公作風入松詞贈之中亦微露此意予聞柯嘗畫白頭黃鸝題詞二絕云云

句

夜雨推篷寫松石焚香何處獨題詩

雲林遺事元鎮既散其田而稅未及推入國朝催科者坐集元鎮逃去潛於蘆葦中燕龍涎香竟蹤跡得之故柯九思詩云云蓋道其實也

雅琥字正卿可溫人登天歷第初名雅古文宗御筆改爲雅琥官至廣西靜江府同知

御溝流葉圖

彩毫將恨付霜紅恨自綿綿水自東金屋有關防虎豹玉書無路託鱗鴻秋期暗度驚催織春信潛通誤守宮莫道人間音問杳明年錦樹又西風

歸田詩話雅正卿有四美人圖詩惟御溝流葉最佳

楊瑀字元誠錢塘人天歷間召見奎章閣官至建德路

總管

山居新話元統間余爲奎章閣屬官題所寓春帖曰光依東壁圖書府心在西湖山水間時余夢山爲江浙儒學提舉寫春帖付男壻實於山居則曰官居東壁圖書府家住西湖山水間偶爾相符亦可喜也

壽松記碑本

舉世紛紛名利間達生輕祿古今難天生瑞兆爲君壽寄我山中作畫看

山居新話至正七年社稷署太祝張從善都城巨室也方四十即致仕嘗預營壽室解石板爲穴門石中忽有紋成松石雖繪畫者不如也觀者填門因以爲碑而真墳牆之中翰林學士歐陽元侍講學士揭傒斯皆爲壽松記刻石以表瑞後附致碑本示余求詩漫以一絕賦之云云

赫德爾字本初

人官江浙參政

句

水泝顛崖流自轉山移絕塞勢尤雄

山語新話江浙參政赫德爾公字本初嘗云向任
留守司都事時本司諸先輩同談內苑萬歲山太
液池本非我朝勦建乃亡金之沼囿也初聖朝起
朔庭絕塞土有一山形勢雄壯峯巒秀異金人望
氣者言此山有王氣當出異人非金之利謀欲傾
圯之計無從出時金已衰微因通好託以入貢爲
辭願求此山之土爲報衆皆鄙笑而許之金人遂
掘其山自備車馬挽載運至幽州城北積累成山
開挑海子栽植花木營構臺殿以爲游幸之所未
幾金亡世祖皇帝登大寶改築京城山適在禁苑
之中至今塞土遺迹尚存其土赤潤草木不生乃
知帝王之宅都會之京興衰之兆天已默定豈人
力之所能爲也公因和萬歲山詩韻云云史册必
載之詳姑錄其畧

林泉生字清源泉之永福人天歷間登進士第官至翰

林直學士有覺是集

弔岳王墓

誰收將骨葬西湖已卜他年必沼吳孤冢有人來下馬六陵無樹可棲烏廟堂短計慚嫠婦宇宙惟公是丈夫往事重觀如敗局一龕燈火屬浮屠

輟耕錄最膾炙人口者如高則誠潘子素林泉生云云

何正字守中分水人至順間應薦授山長轉甯都下河巡檢棄官號雲壑道人

春草

春來無處不芳菲色透湘簾好染衣南浦暝煙鳧鳥沒曲江寒雨鷓鴣飛高人有意憐新綠游子無心戀舊歸淮海年年空入王六朝望業竟成非

月

宴罷瑤臺出禁遲玉輪飛上已多時一天星斗光芒後萬
里銀河影漸移素女夜寒初倦舞嫦娥秋老正含悲黃沙
磧裏涼如水人在青樓有所思

浙江通志初被薦時試以春草月詩二首人爭傳之

黃鎮成字元鎮邵武人至順間屢薦不就後政府奏授
江西儒學副提舉

句

王孫不歸怨芳草山鬼欲啼牽女蘿 鐵檄召雷秋雨足
瑤壇謁帝夜雲高 游山採藥辭家早掃石看雲出洞遲
青山盡處海門闊紅日上來天宇低 花竹一家巢絕

頂煙塵九點認齊州
潮來估客船歸市月上人家水浸空

筆精元季詞人輩出而邵武有黃鎮成詩多奇警
秋聲集十卷佳句疊出如云云惜梨棗朽腐尠有
觀其全篇者

陳楚春字若雷臨武人

句

紅日馬頭天已近青雲雁背雨初晴

萬歷湖廣總志授長沙天臨路教授庚申帝幼年
遠貶南服至道州春爲詩上之有云云之句庚申
喜而諭之曰此等老先生宜大用之乃居此職及
北還登極以春充扈從官至京命題神州八景稱
旨遂擢拜湖南道廉訪使不拜以疾乞歸